

Arfernik angisuunik illersuineq piniarnerlu pillugit Namminersorlutik Oqartussat nalunaarutaat

Piniarnek aallaaniarnerlu pillugit Inatsisartut inatsisaat nr. 12-imi, 29. oktober 1999-imeersumi § 2, imm. 4, § 8, §§ 11-13, § 15 aamma §§ 17-18 naapertorlugit Inatsisartut inatsisaatigut nr. 1, 16. maj 2008-meersukkut kingullermik allanngortinneqartumi taamatullu pinngortitamik illersuineq pillugu Inatsisartut inatsisaat nr. 29, 18. december 2003-meersumi § 5, § 6, imm. 2, § 35, §§ 60-61 aalajangersarneqarpoq:

Kapitali 1

Atuuffia

§ 1. Nalunaarummi matumani "arferit angisuut" tassaapput

- 1) tikaagulliit (*Balaenoptera acutorostrata*),
- 2) tikaagulliusaat (*Balaenoptera physalus*),
- 3) arfviit (*Balaena mysticetus*),
- 4) qipoqqaat (*Megaptera novaeangliae*)
- 5) arferillu soqqallit allat tikaagullinnit kigutilissuarnillu (*Physeter macrocephalus*) anginerusut.

Kapitali 2

Eqqissimatitsineq

§ 2. Arferit angisuut Kalaallit Nunaata aalisarnikkut oqartussaaffigisaata iluani eqqissimatitaapput.

Imm. 2. Tikaagulliit, tikaagulliusaat, arfviit aamma qipoqqaat imm. 1-imi eqqissimatitsinnermit ilaatinneqanngillat.

Kapitali 3

Piniagassanut pisassiissutininik aalajangersaaneq,

§ 3. Ukiumoortumik arfernik angisuunik pisassiissutininik aalajangersaaneq makkua eqqarsaatigalugit pissaaq:

- 1) nunani tamalaani isumaqatigiissutit atsiorneqarsimasut pisuussutit piujuartinnissaat amerliartornissaallu siunertaralugu,
- 2) uumassusilerinikkut siunnersuineq,
- 3) atuisut ilisimasaat aamma,
- 4) Piniarnek pillugu Siunnersuisoqatigiit ilaasortaanit kommuninillu tusarniaaneq.

Imm. 2. Pisassiissutini taakkunungalu piumasaqaatinik aalajangersaaneq pillugu nalunaaruteqarneq tamanut saqqummiunneqartarput www.naalakkersuisut.gl-imi aamma tusagassiorfinnut nalunaarutigalugu.

Kapitali 4

Piniarsinnaanermut akuersissutit, akuersissuteqarnerit aamma nakkutilliineq

Piniarsinnaanermut akuersissutini allagartanillu agguaassisarneq

§ 4. Kommunalbestyrelsi Naalakkersuisut pisassatut aalajangersimasaasa iluanni nalinginnaasumik akuersissuteqassaaq, piginnittumut angallat aqqatigut taasaq erseqqinnerusumilluunniit suussusiligaq atorlugu, § 15 naapertorlugu tikaagulliusaanik pisaqarsinnaanermut.

Imm. 2. Kommunalbestyrelsi Naalakkersuisut pisassiissutit aalajangiussat iluini piniarsinnaanermut akuersissummik normulersukkanik tunniussisarpoq, tassuuna piginnittoq piniarsinnaanermut normunut tamanut angallammik aqqatigut taasaq erseqqinnerusumilluunniit suussusiligaq atorlugu § 11 naapertorlugu tikaagullimmik ataatsimik, § 18 naapertorlugu arfvimmik ataatsimik aamma § 21 naapertorlugu qipoqqarmik ataatsimik pisaqarsinnaasunngorlugu.

Imm. 3. Tikaagullimmik, arfvimmik aamma qipoqqarmik piniarnissamut akuersissutit tunniunneqartarput kommunalbestyrelsimut qinnuteqartoqareernerata kingorna nunaqarfinni siulersuisut aamma najukkami aalisartunut piniartunullu peqatigiiffik tusarniaavigereerlugit. Piniarsinnaanermut akuersissutit agguaanneqassapput allattuiffissat normulersukkat Aalisarnermut, Piniarnermut Nunalerinermullu Naalakkersuisoqarfiup kommunalbestyrelsimut nassiussai atorlugit.

Imm. 4. Kommunimi akuersissutit allagartallu agguaanneqartut qinnuteqaatinit tiguneqarsimasunit ikinnerussagaluarpata arfernik angisuunik piniarnissamut agguaassisoqassaaq tulleriiaarilluni, ukiumi siuliani pisarineqarsimasut kiisalu piniarsinnaanermut akuersissutit atorneqanngitsut eqqarsaatigalugit.

§ 5. Arfeqatigiinnut sisamaasunut tamanut tamakkiisumik pisassiissutit piffissap piniarfiussap aallartinnginnerani ataatsikkoortumik agguaanneqassapput.

Imm. 2. Kommunalbestyrelsi tikaagulliusaarniarnissamut akuersissuteqarsinnaavoq inunnut, atuuttumik inuussutissarsiutigalugu piniarnermut allagartalinntut, aamma akuerisaasumik qaartartortalinnik tuukkartalimmik qamutililimmik angallatilimmut. Angallammik piginnittoq nammineq imaluunniit angallammi inuttaq arfernut qaartartortalimmik tuukkartalimmik atuisinnaanermut pikkorissarsimanermut atuuttumik uppersaateqassaaq. Akuersissutit tassaavoq allagaq kommunalbestyrelsip qinnuteqartumut tikaagulliusaarniarnissamut piumasaqaatinik naammassinissimasumut tunniussaa.

Imm. 3. Kommunalbestyrelsi arfvinniarnissamut aamma qipoqqarniarnissamut akuersissuteqarsinnaavoq inunnut atuuttumik inuussutissarsiutigalugu piniarnermut allagartalinntut, akuerisaasumik qaartartortalinnik tuukkartalimmik qamutililimmik angallatilinnut, piginnittoq nammineerluni imaluunniit inuttaasoq arfanniarnermut qaartartumik tuukkartalimmik qamutilimmut atuinissamut pikkorissarnermut peqataasimanermut atuuttumik uppersaateqassaaq.

Imm. 4. Kommunalbestyrelsi tikaagullinniarnissamut akuersissuteqarsinnaavoq inunnut atuuttumik inuussutissarsiutigalugu piniarnermut allagartalinntut, aammaluunniit:

1) akuerisaasumik qaartartortalimmik tuukkartalimmik qamutililimmik angallatilinnut, aammalu piginnittoq nammineerluni imaluunniit inuttaasoq arfanniarnermut qaartartumik tuukkartalimmik qamutililimmik atuinissamut pikkorissartitsinermut peqataasimanermut atuuttumik uppersaateqassaaq, imaluunniit

2) § 13 naapertorlugu ataatsimoorluni piniarnissamut immikkut akuersissuteqartumut.

Imm. 5. Kinaluunniit angallammut tuukkartalimmik qamutililimmik imaluunniit ataatsimoorluni piniarnissamut ataatsikkut akuersissummik tunineqarsinnaanngilaq.

Imm. 6. Ataatsimoorluni piniartoqassatillugu piniarnermut naalakkatut toqqarneqartumut akuersissuteqartoqassaaq. Ataatsimoorluni piniarnermut peqataasussat allat aqqi piniarsinnaanermut akuersissutip tunuani allanneqassapput.

Imm. 7. Piniarsinnaanermut akuersissutit akuersissuteqarnerillu qaammatisiutit ukiuat malillugu ukiumut ataatsimut atuupput, taamaattorli takuuk § 8, imm. 4.

§ 6. Kommunalbestyrelsi tikaagullinniarnissami, arfvinniarnissami aamma qipoqqarniarnissami pisassiissutinut naapertuuttunik piniarsinnaanermut akuersissuteqareeripat kommunalbestyrelsip Aalisarnermut, Piniarnermut Nunalerinermullu Naalakkersuisoqarfimmut nassiutissavai akuersissuteqarfigineqartut aqqi, inuttut normui, akuersissutit normui aamma GR-normut pillugit paasissutissat kingusinnerpaamik kommunip akuersissutinut immersuiffik Naalakkersuisoqarfimmiit tigusaqarnerata kingornatigut qaammat ataaseq qaangiutsinnagu.

Imm. 2. Tikaagullimmik, arfvimmik aamma qipoqqarmik piniarsinnaanermut akuersissut Kalaallit Nunaata Kitaani aamma Tunumi tikaagullimmut atorineqariissaaq arfeq pisineneqarpat pissanneqarpalluunniit.

Imm. 3. Akuersissut ukiakkut pisassiissutinik sinneruttunik agguasseqqittoqartinnagu atorineqarsimanngitsoq pisassiissutinut agguateqqitassanut ingerlaannartumik ilanngunneqassaaq, tamatumalu kingornatigut akuersissummik piginnittuusimasumit atorineqarsinnaassanani.

§ 7. Aalisarnermut, Piniarnermut Nunalerinermullu Naalakkersuisoqarfiup ukiumi tulluuttumi kommunimi pisassiissutit ikilisissinnaavai paasineqassagualupat kommunimi:

1) tikaagulliusaartoqarsimasooq pissaasoqarsimalluniluunniit akuersissuteqartoqarani,

2) akuersissuteqarani tikaagullittoqarsimappat, arfvittoqarsimappat qipoqqartoqarsimappalluunniit pissaasoqarsimalluniluunniit imaluunniit

3) qaammatisiutit ukiuat malillugit ukiumut akuersissutigineqartunit amerlanerusunik tikaagullittoqarsimappat, tikaagulliusaartoqarsimappat, arfvittoqarsimappat imaluunniit qipoqqartoqarsimappat pissaasoqarsimalluniluunniit. Pisassiissutit ikilineqarsinnaapput tikaagullinnut, tikaagulliusaanut, arfvinnut qipoqqarnulluunniit apeqqutaatinnagu sorlernut unioqqutitsisoqarsimanersoq.

Imm. 2. Arfernik eqqissisimatitaasunik pisaqarneq pissannerluunniit ukiumi pineqartumi ukiumiluunniit tulluuttumi kommunimi inatsisinik unioqqutitsiviusumi pisassiissutit ikilisinneqarnerannik kinguneqarsinnaavoq. Tikaagullinnut, tikaagulliusaanut, arfvinnut qipoqqarnulluunniit pisassiissutinik ikilitsisoqarsinnaavoq.

§ 8. Aalisarnermut, Piniarnermut Nunalerinermullu Naalakkersuisoqarfiup najukkami aalisartut piniartullu peqatigiiffiat tusarniaavigereerlugu aalajangiisinnaavoq piniarsinnaanermut akuersissut tunniunneqarsimasoq imaluunniit akuersissutit tunniunneqarsimasut kommunip iluani nuunneqassasut imaluunniit atorunnaassasut tamanna pillugu tamanut saqqummiussilluni www.naalakkersuisut.gl atorlugu tusagassiorfinnullu nalunaaruteqartoqarsimappat.

Imm. 2. Nalunaaruteqartoqareerpat piniarsinnaanermut akuersisummik piginnittup imaluunniit akuersissutit piginnittut piniarsinnaanermut akuersissut imaluunniit akuersissutit kommunalbestyrelsimut tunniutissavaat.

Imm. 3. Aalisarnermut, Piniarnermut Nunalerinermullu Naalakkersuisoqarfiup kommunalbestyrelsi piumaffigisinnaavaa imm. 1 naapertorlugu piniarsinnaanermut akuersissutit tunniunneqareersimasut atorunnaarseqqullugit, tassa akuersissuteqartumit akuersissuteqartunilluunniit piffissaq eqqorlugu arfernik pisanik pissatanillu nalunaarutiginnittarneq pillugu Namminersorlutik Oqartussat nalunaarutaani maleruagassat malillugit arferit pisat pissatallu pillugit Aalisarnermut, Piniarnermut Nunalerinermullu Naalakkersuisoqarfimmut nalunaaruteqarsimanngippata.

Imm. 4. Aalisarnermut, Piniarnermut Nunalerinermullu Naalakkersuisoqarfik Kalaallit Nunaanni Aalisartut Piniartullu Kattuffiat (KNAPK) aamma kommunit siumut tusarniaareerluni www.naalakkersuisut.gl aamma tusagassiorfitsigut nalunaaruteqarnikkut, akuersissutit atorussanngortinneqarsimasut kommunip iluani, kommunimut allamut nuunneqartut imaluunniit atorunnaarsinneqartut piffissaq nalunaaruteqarfusoq aallartiffigalugu. Tamatuma kingorna akuersissutit utertinneqassapput, takuuk imm. 2.

Pisassiissutit agguasseqqinneq

§ 9. Aalisarnermut, Piniarnermut Nunalerinermullu Naalakkersuisoqarfik KNAPK aamma kommunit tusarniaavigereerlugit tikaagullinnut, tikaagulliusaanut, arfvinnut aamma qipoqqarnut pisassiissutit sinnerisinnaasaat agguateqqissavai. Ukiuni qaammatisuteqarfusuni tamani kingusinnerpaamik 1. september tikaagullittassanik, tikaagulliusaartassanik, arfvittassanik aamma qipoqqartassanik agguasseqqinnissaq aallartinneqarsimassaaq. Arfanniarneq inerteqqutaavoq agguasseqqinnissaq ullormik ataatsimik sioqqullugu aatsaallu aallarteqqinneqarsinnaalluni kommunimi najukkami aalisartut piniartullu peqatigiiffii tusarniaavigereerlugit nutaamik agguasseqqereerpat tamanullu nalunaaruteqareerpat.

Imm. 2. <http://www.naalakkersuisut.gl/Agguasseqqinneq> tamatumunngalu piumasaqaatit pillugit nalunaaruteqarneq tamanut saqqummiunneqassaaq www.naalakkersuisut.gl aqqutigalugu tusagassiorfinnullu nalunaaruteqarnikkut.

Imm. 3. Nalunaaruteqartoqareerpat piniarsinnaanermut akuersisummik piginnittup imaluunniit akuersissutit piginnittut akuersissut imaluunniit akuersissutit kommunalbestyrelsimut tunniutissavaat.

Imm. 4. Piffissami 15. augustimiit agguasseqqinnissap tungaanut tikaagullinniarnissaq, tikaagulliusaarniarnissaq, arfvinniarnissaq aamma qipoqqarniarnissaq eqqarsaatigalugit, kommunalbestyrelsit ataasiakkaat akunnerminni namminneq pisassiissutit sinneruttunik agguasseqqissinnaapput. Kommunini pineqartuni agguasseqqittoqassaaq najukkani aalisartut piniartullu peqatigiiffii tusarniaavigereerlugit.

Imm. 5. Nunap immikkoortortaani inuussutissarsionermut allaffiit aqutsiveqarfinni Tasiilami aamma Ittoqqortoormiini Kommuneqarfik Sermersuumiittumi najukkami aalisartut piniartullu peqatigiiffii suleqatigalugit akunnerminni Tunumi pisassiissutinik agguaasseqqinnissaq oqaloqatigiissutigisinnaavaat 1. augustip kinguninnguatigut.

Imm. 6. Imm. 3 aamma 4 naapertorlugit agguaasseqqinneq pillugu aalajangiussat allaganngorlugit Aalisarnermut, Piniarnermut Nunalerinermullu Naalakkersuisoqarfimmut nalunaarutigineqassapput agguaasseqqittoqannginnerani kingusinnerpaamik sapaatip akunneranik sioqqullugu. Taamatuttaaq pisassiissutit sinnerinik agguaasseqqinnermi angusat Aalisarnermut, Piniarnermut Nunalerinermullu Naalakkersuisoqarfimmut nalunaarutigineqassapput.

Imm. 7. Aalisarnermut, Piniarnermut Nunalerinermullu Naalakkersuisup KNAPK aamma kommunit tusarniaavigereerlugit www.naalakkersuisut.gl aqutigalugu aamma tusagassiorfinnut nalunaaruteqarnikkut tamanut saqqummiussilluni nalunaarutigisinnaavaa, akuersissutit tunniunneqarsimasut kommunimut allamut imaluunniit kommunip iluani nuunneqarsimasut imaluunniit atorunnaarsimasut nalunaaruteqarnerup saqqummiunneqarnerani piffissamiit atuutilersumik. Tamatuma kingorna akuersissutit utertinneqassapput imm. 3 naapertorlugu.

Kapitali 5

Arfernik piniarneq

Tikaagulliit

§ 10. Aalisarnermut, Piniarnermut Nunalerinermullu Naalakkersuisoqarfiup ukiut tamaasa KNAPK aamma kommunit tusarniaavigereerlugit nalunaarutigissavaa, tikaagulliit amerlanerpaamik qassit qaammatisiutit ukiuanni Kalaallit Nunaata Kitaani aamma Tunumi pisarineqarsinnaanersut.

§ 11. Tikaagulliit taamaallaat piffissami 1. januaarimiit - 31. decembarimut pisarineqarsinnaapput, ullut taaneqartut marluk ilanngullugit.

Imm. 2. Tikaagulliit piaqqisartillugit arnavissat piaraalluunniit pisarineqaqqusaanngillat.

Imm. 3. Taamaallaat inuit arfanniarsinnaanermut akuersissutillit akuerisaasunillu atortullit tikaagullissinnaapput, takukkit §§ 4, 12 aamma 23. Atortut Aalisarnermut, Piniarnermut Nunalerinermullu Naalakkersuisoqarfimmit taamaasiornissamut ingerlatseqatigiiffimmit akuerisaasumit akuersissutigineqarsimassapput.

Tikaagullinniarnermi atortut

§ 12. Angallatit qaartartortalimmik tuukkartalimmik qamutilillit, tikaagullinniarnermut peqataasut, sutigut tamatigut 9,2 aamma 22,0 meterit akornanni angissuseqassapput ningittakkanut qalorsuarnulluunniit amooruteqassallutik minnerpaamik 2 tonsinik amoorisinnaassusilinnik imaluunniit angallatit qaqitsissuteqassapput.

Imm. 2. Angallatit imm. 1-imi taaneqartut Umiartornermik Aqutsisoqarfimmi GR-normulerlugit, radiukkut kalerrisaarinnermi ilisarnaaserlugit nalunaarsorneqarsimassapput kiisalu angallatip piginnittua nalunaarsugaasimassalluni.

Imm. 3. Tikaagullinniarnermut taamaallaat atorineqarsinnaapput qamutiliit qaartartortalimmik tuukkartallit 50 mm-inik kaliberillit tikaagullinniarnermi qaartartortalinnik tuukkallit §§ 23 aamma 24 naapertorlugit. Qaartartortalinnik tuukkartat arfanniutit Aalisarnermut, Piniarnermut Nunalerinermullu Naalakkersuisoqarfimmit akuerineqarsimasuussapput.

Imm. 4. Taamaallaat inuit qaartartortalimmik tuukkamik arfanniummik atuinissamut pikkorissartitsinernut peqataasimanerminnut atuuttumik uppernarsaatillit qaartartunik taaneqartunik pisisinnaapput atuisinnaallutillu.

Imm. 5. Qaartartortalinnik tuukkartanik arfanniutinik taamaallaat tunisisoqarsinnaavoq imm. 4 naapertorlugu atuuttumik uppernarsaammik ukiumut pineqartumut piniarsinnaanermut akuersisummik atuuttumik takutitsisoqarneratigut.

Imm. 6. Tikaagullik pissanneqartoq, toqunneqanngitsorli sapinngisamik piaarnerpaamik toqunneqassaaq. Niaquagut aallaallugu toqunneqassaaq, qaartartortalimmik tuukkamik arfanniummik imaluunniit qoorortuumik minnerpaamik 7,62x65 mm (.30-06)-imik sulloqqortussusilimmik.

Imm. 7. Piniarsinnaanermut akuersissutilik piffissaalluarallartillugu piniarnissamut pilersaarut aamma ulloq piniarfusussaq pillugit sumiiffimmi piniarnermut aalisarnermullu nakkutilliisumut siumoortumik nalunaarutigissavai.

Ataatsimoorluni tikaagullinniarneq

§ 13. Aalisarnermut, Piniarnermut Nunalerinermullu Naalakkersuisoqarfik akuersisinnaavoq ataatsimoorluni piniarnermi qamutilimmik tuukkartalimmik sakkoqanngikkaluarluni amerlanngitsunik tikaagullittoqarsinnaaneranut. Taamatut akuerinnittoqarsinnaavoq piniarneq nunaqqatigiinnut annertuumik pingaaruteqarpat aamma nunaqqatigiit angallatinit tuukkartalinnik qamutililinnit neqinik nutaanik naammattumik pilersorneqarsinnaanngippata.

Imm. 2. Aalisarnermut, Piniarnermut Nunalerinermullu Naalakkersuisoqarfiup ataatsimoorluni tikaagullinniarnissamut akuersissutigineqartut aqutsiveqarfinnut agguaatissavai KNAPK aamma kommunit tusarniaavigereerlugit, nunamut tamakkerlugu pisassat tamarmiusut agguaanerannut peqatigitillugu.

Imm. 3. Kommunip ataatsip aqutsiveqarfiullu ataatsip iluani ataatsimut piniaqatigiilluni piniarsinnaanermut akuersissutit agguanneqarneranni nunaqarfiit tamatumalu tulliani illoqarfiit qaartartortalimmik tuukkartalimmik qamutililinnik angallateqanngitsut sallerpaatinneqassapput.

Imm. 4. Taamaallaat umiatsianik piginnittut ataatsimoorluni piniarnissamut akuersisummik tunineqarsinnaapput.

Imm. 5. Piniaqatigiinnermi akuersissuteqarnissami piumasaqaatigineqarpoq:

- 1) piniarneq aaqqissuunneqassasoq ataatsimoorluni piniarnertut ikinnerpaamik umiatsiaaqqat tallimat piniarnerni ataasiakkaani peqataatillugit,
- 2) angallatit qaartartortalimmik tuukkartalimmik qamutileqanngitsut sutigut tamatigut 9,2 meterit angullugit angissusillit ataatsimoorluni piniarnermi peqataasinnaapput, kisiannili angallatitut siuttuutinneqassanatik.
- 3) piniarneq qoorortuut minnerpaamik 7,62x63 mm-imik (.30-06) sulloqqortussusillit atorlugit ingerlanneqassaaq,
- 4) umiatsiaaqqat tamarmik unaaqassapput alertalinnik avataqassallutillu pisap kivisinnginnissaanut

naammattunik.

5) angallatit ataatsimoorluni piniarnermut peqataasut taamatuttaaq ningittakkanut qalorsuarnulluunniit amoortaateqassapput minnerpaamik 2 tonsinik kivitsisinnaasunik, kraftblokimilluunniit atortuligaassallutik.

6) piniarnek ingerlanneqassasoq naalakkamit, agguaanermut atatillugu najukkami aalisartut piniartullu peqatigiiffiannit kommunimillu umiatsiaaqqanik piginnittut akornannit toqqarneqartumit piniarsinnaanermut akuersissummillu piginneqataasunit tamanit siumut ilisimaneqartumit aqunneqarluni,

7) piniarnek aallartinneqassanngilaq ataatsimoorluni piniarnermut peqataasussat piniarsinnaanermik akuersissummillu piginneqataasut tamarmik piniarnerup aallartinnissaanik kalerrinneqareertinnagit.

8) tikaagullik sapinngisamik pilertornerpaamik toqusarneqassaaq aamma

9) piniarsinnaanermut akuersissummik pisaqarnermi peqataasut pisap agguarneqarnerani ilaatinneqassapput.

Imm. 6. Piniarsinnaanermut akuersissutillip piffissaalluarallartillugu piniarnissamut pilersaarut aamma ulloq piniarfusussaq pillugit sumiiffimmi piniarnermut aalisarnermullu nakkutilliisumut siumoortumik nalunaarutigissavai.

Tikaagulliusaat

§ 14. Ukiut tamaasa Aalisarnermut, Piniarnermut Nunalerinermullu Naalakkersuisoqarfiup KNAPK aamma kommunit tusarniareerlugit nalunaarutigisassavaa qaammatisiutit ukiuat malillugu ukiumi tassani Kalaallit Nunataa Kitaani tikaagulliusaat qassit pisaquineqarsinnaanersut.

§ 15. Tikaagulliusaat piffissami 1. januaarimiit 31. decembarimut ullut marluk pineqartut ilanngullugit pisaquineqarsinnaapput.

Imm. 2. Tikaagulliusaat piaqqisartillugit arnavissat piaqqalluunniit pisaquineqaqqusaanngillat.

Imm. 3. Taamaallaat inuit tikaagulliusaarniarnissamut akuersissutillit akuerineqarsimasunillu atortullit tikaagulliusaarsinnaapput §§ 4, 16 aamma 23 naapertorlugit. Atortut ingerlatseqatigiiffimmit Aalisarnermut, Piniarnermut Nunalerinermullu Naalakkersuisoqarfimmit taamaasiornissamut akuerineqarsimasumit akuersissutigineqarsimassapput.

Tikaagulliusaarniarnermi atortut

§ 16. Angallatit tikaagulliusaarniarnissamut akuerisat makkuupput:

1) angallat ataaseq minnerpaamik 11,0 meter t.t.-imik takissusilik.

2) Tikaagulliusaamut ataatsimut ikinnerpaamik angallatit marluk tamarmik minnerpaamik 9,2 meterinik (t.t.) takissusillit.

Imm. 2. Angallatit imm. 1-imi taaneqartut Umiartornermik Aqutsisoqarfimmi GR-normulerlugit, radiukkut kalerrisaarinnermi ilisarnaaserlugit nalunaarsorneqarsimassapput kiisalu angallatip piginnittua nalunaarsugaasimassalluni.

Imm. 3. Angallatit imm. 1-imi taaneqartut qaartartortalinnik tuukkartalinnik qamutileqassapput aamma ningittakkanut qalorsuarnulluunniit amoorutininik minnerpaamik tonsinik tallimanik qaqitsisinnaassusillinnik amooruteqassapput imaluunniit kraftblokimik atortulissallutik. Angallatit

tamarmik aleqassapput sioqutalimmik avataqassallutillu pisanineqartup kivinnginnissaanut naammattunik.

Imm. 4. Tikaagulliusaarniarnermi taamaallaat atorneqarsinnaapput qamutillit tuukkartallit minnerpaamik 50 mm-inik sulloqqortussusillit tuukkallu nuuatigut tikaagulliusaamut atortakkamik qaartartortallit, takukkit §§ 23 aamma 24. Tuukkat qaartartortallit arfanniutit Aalisarnermut, Piniarnermut Nunalerinermullu Naalakkersuisoqarfimmit akuersissutigineqarsimassapput.

Imm. 5. Tikaagulliusaarniarnerit tamaasa qaartartup tuukkap arfanniutip saniatigut allamik unaamik qaartartortalimmik tuukkartalimmik arfanniummik piareersimasoqassaaq.

Imm. 6. Taamaallaat inuit qaartartortalimmik tuukkamik arfanniummik atuinissamut pikkorissartitsinernut peqataasimanerninnut atuuttumik uppersaataillit taamaattunik pisisinnaapput atuisinnaallutillu.

Imm. 7. Qaartartunik tuukkartalinnik arfanniutitik taamaallaat tunisisoqarsinnaavoq imm. 6 naapertorlugu atuuttumik uppersaammik kiisalu ukiumut pineqartumut akuersisummik atuuttumik takutitsisoqarneratigut.

Imm. 8. Tikaagulliusaaq pissanneqartoq, toqunneqanngitsorli sapinngisamik piaartumik toqunneqassaaq. Toqutsisoqassaaq niaquatigut qaartartumik tuukkamik tikaagulliusaarniummik aallaallugu.

Imm. 9. Akuersisummik pigisalik piffissaalluarallartillugu piniarnissamut pilersaarut aamma ulloq piniarfusussaq pillugu sumiiffimmi piniarnermut aalisarnermullu nakkutilliisumut siumoortumik nalunaaruteqassaaq.

Arfiviit

§ 17. Ukiut tamaasa Aalisarnermut, Piniarnermut Nunalerinermullu Naalakkersuisoqarfiup KNAPK aamma kommunit tusarniareerlugit nalunaarutigisassavai qaammatisiutit ukiuat malillugu ukiumi tassani Kalaallit Nunataa Kitaani arfiviit qassit pisanineqarsinnaanersut.

§ 18. Taamaallaat arfiviit inersimasut pisanineqarsinnaapput piffissami apriliip 1-niit decembarip 31-anut ullut pineqartut marluk ilanngullugit.

Imm. 2. Arfiviit piaqqisarpata arnaat piaraalluunniit pisanineqaqqusaanngillat.

Imm. 3. Taamaallaat inuit arfanniarnermut licensillit akuerisaasunillu atortoqartut arfivinniarsinnaapput, takukkit §§ 4, 19 aamma 23. Atortut Aalisarnermut, Piniarnermut Nunalerinermullu Naalakkersuisoqarfimmit taamaasiornissamut ingerlatseqatigiiffimmit akuerisaasumit akuerineqarsimasuussapput.

Arfivinniarnermi atortut

§ 19. Angallatit arfivinniarnissamut taamaallaat akuerisat ukuupput:

Arfivimmuut ataatsimut angallatit ikinnerpaamik pingasut tamarmik takissuseq tamakkerlugu (t.t.) minnerpaamik 11,0 meterinik takissusillit.

Imm. 2. Angallatit imm. 1-imi taaneqartut Umiartornermik Aqutsisoqarfimmi GR-normulerlugit, radiukkut kalerrisaarineri ilisarnaaserlugit nalunaarsorneqarsimassapput kiisalu angallatip piginnittua nalunaarsugaasimassalluni.

Imm. 3. Angallatit imm. 1-imi taaneqartut qamutilimmik qaartartortalinnik tuukkartalinnik aamma

ningittakkanut qalorsuarnullunniit amoorutininik minnerpaamik tonsinik tallimanik qaqitsisinnaassusilinnik amooruteqassapput imaluunniit amoorummik atortuligaassallutik. Angallatit tamarmik aleqassapput sioqarlutik aamma avataqassallutik pisinineqartup kivinnginnissaanut naammattunik.

Imm. 4. Arfivinniarnermi taamaallaat atorneqarsinnaapput qamutillit tuukkartallit minnerpaamik 50 mm-inik sulloqqortussusillit tuukkallu nuuatigut ikkuttakkanik tikaagulliusaamut atortakkamik qaartartortallit, takukkit §§ 23 aamma 24. Qaartartut Aalisarnermut, Piniarnermut Nunalerinermullu Naalakkersuisoqarfimmiit akuerineqarsimasussaapput.

Imm. 5. Arfivinniarnerit tamaasa angallatit arfivinniarnermi ilaasut tuukkamik qaartartortalimmik allamik arfanniummik piareersimatitsisoqassaaq.

Imm. 6. Taamaallaat inuit qaartartortalimmik tuukkamik arfanniummik atuinissamut pikkorissartitsinernut peqataasimanerminnut atuuttumik uppersaattillit qaartartunik taaneqartunik pisinnaapput passussisinnaapput.

Imm. 7. Qaartartunik tuukkartalinnik arfanniutininik taamaallaat tunisisoqarsinnaavoq imm. 6 naapertorlugu atuuttumik uppersaammik kiisalu ukiumut pineqartumut licensimik atuuttumik takutitsisoqarneratigut.

Imm. 8. Arfivik pissanneqartoq, toqunneqanngitsorli sapinngisamik piaartumik toqunneqassaaq. Toqutsineq pissaaq saneraaniit sakiaatigut tuukkaaqaartartortalik arfivinniut atorlugu.

Imm. 9. Licensimik pigisaqartoq piffissaalluarallartillugu piniarnissamut pilersaarut aamma ulloq piniarfusussaaq pillugu piniarnermut aalisarnermullu nakkutilliisumut sumiiffimmi qaninnermut siumoortumik nalunaaruteqassaaq.

Qipoqqaat

§ 20. Aalisarnermut, Piniarnermut Nunalerinermullu Naalakkersuisoqarfik, KNAPK aamma kommunit tusarniaaffigereerlugit ukiut tamaasa nalunaarutigisarpai Kitaani qipoqqaat amerlanerpaamik qassit ukioq taanna pisinineqarsinnaanersut.

§ 21. Taamaallaat qipoqqaat inersimasut pisinineqarsinnaapput piffissami januaarip 1-ianiit decembarip 31-anut ullut pineqartut marluk ilanngullugit.

Imm. 2. Qipoqqaat piaqqisartillugit arnaat piaraalluunniit pisinineqaqqusaanngillat.

Imm. 3. Taamaallaat inuit arfanniarnissamut licensiuteqartut qipoqqarnissamullu atortunik akuerisanik peqartut qipoqqarniarsinnaapput, takukkit §§ 4, 22 aamma 23. Atortut ingerlatsivinnit Aalisarnermut, Piniarnermut Nunalerinermullu Naalakkersuisoqarfimmit taamaaliornissamut pisinnaatissimasaanit akuerineqarsimasussaapput.

Qipoqqarniarnermi atortut

§ 22. Angallatit qipoqqarniarsinnaanermut akuerineqartut ukuupput:

- 1) Angallat ataaseq takissusaa minnerpaamik 11,0 meterimik (t.t.) takissusilik.
- 2) Qipoqqarmut ataatsimut angallatit ikinnerpaamik marluk takissusaaq minnerpaamik 9,2 meterimik (t.t.) takissusillit.

Imm. 2. Angallatit imm. 1-imi taaneqartut Umiartornermik Aqutsisoqarfimmi GR-normulerlugit,

radiukkut kalerrisaarinermi ilisarnaaserlugit nalunaarsorneqarsimassapput kiisalu angallatip piginnittua nalunaarsugaasimassalluni.

Imm. 3. Angallatit imm. 1-imi taaneqartut qamutilimmik tuukkartalinnik aamma ningittakkanut qalorsuarnut amoorutininik minnerpaamik tonsinik tallimanik qaqtisisinnaassusilinnik amoortaateqassapput imaluunniit kraftblokimik atorulersugaassallutik. Angallatit tamarmik aleqassapput sioqutalimmik avataqassallutillu pisinineqartup kivinnginnissaanut naammattunik.

Imm. 4. Qipoqqarniarnermi taamaallaat atorineqarsinnaapput qamutillit qaartartortalinnik tuukkartallit minnerpaamik 50 mm-inik sulloqqortussusillit tuukkallu nuuatigut ikkuttakkanik qipoqqarniarnermut atorakkanik qaartartortalit imaluunniit allat arfernut angisuunut akuerisat qaartartortalinnik tuukkartallit arfanniutinngorlugit allanngortitikkat, takukkit §§ 23 aamma 24. Qaartartortalinnik tuukkat arfanniutit Aalisarnermut, Piniarnermut Nunalerinermullu Naalakkersuisoqarfimmiit akuerineqarsimassapput.

Imm. 5. Qipoqqarniarnerit tamaasa tuukkamik qaartartortalimmik allamik piareersimatitsisoqassaaq.

Imm. 6. Taamaallaat inuit qaartartumik tuukkap nuuanut ikkuttakkamik atuinissamut pikkorissartitsinerlut peqataasimanerminnut atuuttumik uppersarsaatillit qaartartumik pineqartumik pisinnaallutillu passussisinnaapput.

Imm. 7. Qaartartunik tuukkap nuuanut ikkuttakkanik taamaallaat tunisisoqarsinnaavoq imm. 6 naapertorlugu atuuttumik uppersarsaammik, kiisalu ukiumut pineqartumut licensimik atuuttumik takutitsisoqarneratigut.

Imm. 8. Qipoqqaq pissanneqartoq, toqunneqanngitsorlu sapinngisamik piaartumik toqunneqassaaq. Toqutsineq pissaaq tuukkaq qaartartortalik atorlugu niaquata nalaatigut qipoqqarniummik qaartartulimmik tuukkartalirlugu.

Imm. 9. Licensimik pigisaqartoq piffissaq naleqquttoq sioqqullugu sumiiffimmi piniarnermut aalisarnermullu nakkutilliisumut qaninnermut siumoortumik nalunaaruteqassaaq.

Qamutillit tuukkartallit ataatsimut isigalugit

§ 23. Qamutillit tikaagullinniarnermut, tikaagulliusaarniarnermut, arfvinniarnermut qipoqqarniarnermullu atorineqartut teknikikkut atorsinnaassutsimikkullu akornuteqassanngillat, taamaalilluni inuit ajoquseriataarnissaannut ulorianartorsiortitsissanatik. Taamatuttaaq piniarnermut atorlut imatut siunertarineqartunut naleqqutsigissapput arfermik toqusaaneq sapinngisamik sukkanerpaamik pisinnaassalluni.

Imm. 2. Qamutilimmik qaartartortalimmik tuukkartalimmik angallammut ikkussineq tamatigut suliffeqarfimmit Aalisarnermut, Piniarnermut Nunalerinermullu Naalakkersuisup taamaasiorsinnaanissamut piginnaatinneqarsimasumit akuerineqarsimassaaq.

§ 24. Qamutillit qaartartortalimmik tuukkartallit tamarmik ukioq allortarlugu ingerlatsivimmit Aalisarnermut, Piniarnermut Nunalerinermullu Naalakkersuisoqarfimmit taamaaliornissamut piginnaatinneqarsimasumit akuersissutigineqarsimassaaq.

Akuerineqareerluni toqutsisariaqarneq

§ 25. Arfernik angisuunik annertuunik ikilikkanik toqulersunik, tunillaassuuttumik nappaateqarunarlutik naammattoorneqarsimasunik, arfernik angisuunik aalisarnermi qassutitut aalisarnermiluunniit atortunut allanut nerngussimasunik, kiisalu arfernik angisuunik sassaasunik toqutsineq siumut Aalisarnermut, Piniarnermut Nunalerinermullu Naalackersuisoqarfik akuersitereerlugu toqutsisoqarsinnaavoq.

Imm. 2. Maleruaqqusanik unioqqutitsinani tikaagullimmik, tikaagulliusaamik, arfivimmik imaluunniit qipoqqarmik pisaqarnermi, pisaq inunniit nerissallugu piukkunnanngitsoq paasinarsissagaluarpas, pisap nappaateqarneranik imaluunniit allamik pissuteqartumik, Aalisarnermut, Piniarnermut Nunalerinermullu Naalackersuisoqarfik akuersissuteqarsinnaavoq, pisaq toqutsinertut isigineqarsinnaasoq. Pisaqarnermi licensi imaluunniit akuersissut atorineqarsimappat taanna sulit atuutiinnassaaq.

Imm. 3. Imm. 1 naapertorlugu piniakkat toqunneqartut najukkami innuttaasunut agguanneqarsinnaapput, pisaq nerineqarsinnaasutut naleqquppat.

Kapitali 6

Pilaffik pisallu atorluarneqarnissaat

Pilaffik

§ 26. Kommunalbestyrelsi, sumiiffimmi aalisartut piniartullu peqatigiiffiat tusarniareerlugu pilattarfinnik akuerisaasunik toqqaanissamut akisussaasuvoq.

Imm. 2. Arfanniarnermi angallammi ittuusup arfermik pisaqarfimmiit pilaffissamut ungasissuseq qaninnerpaanissaa nakkutigissavaa, asiutitsisoornissaq taamaasillunilu annaasaqarnissaq pinaveersimatinniarlugu.

Pisamik atorluannissaq

§ 27. Kikkulluunniit arfermik angisuumik pisaqartut pisarineqartup nerineqarsinnaasortai tamaasa iluaqutigissallugit pisussaapput. Pisarineqartoq tamakkerlugu atorineqarsinnaanngippat tunineqarsinnaananiluunniit pisaqartoq pisussaavoq sinneruttut sumiiffimmi najugaqartunut tunniutissallugit.

Imm. 2. Arfernik pilanneq kiisalu arferup perlukuinik eqqaaneq inuussutissalerinermi nakkutilliinermik inatsisit aamma avatangiisit illersorneqarnissaannik inatsisit naapertorlugit ingerlanneqartassaaq. Arferup saanikuinik pinngortitami asiutinneqarnissai siunertaralugit inissiigallarnissaq pissaaq Aalisarnermut, Piniarnermut Nunalerinermullu Naalackersuisoqarfik aamma najukkami kommunini oqartussaasut sukumiinerusumik isumaqatigiissuteqarfigereerlugit.

Kapitali 7

Pisamik nalunaarsuineq, tunitsivinnut tunisineq aamma tuniniaaneq

Nalunaarsuineq

§ 28. Tikaagulliit, tikaagulliusaat, arfviit qipoqqaalluunniit pisarineqartut tuniniarneqalissanngillat kommunip allaffia taassumaluunniit immikkoortortaarfia pisarineqartunik nalunaarsuisoqarsimatinnagu.

Nalunaarsuisoqartassaaq akuersissummi allagartamiluunniit naqissusiinikkut.

Imm. 2. Akuersissummik imaluunniit qamutilimmik tuukkartalimmik qaartartortalimmik piniarnissamut akuersissummik piginnittoq naqitsimmik naqissusiisoqartinnagu pisussaavoq tuukkamik qaartartortalimmik arfanniummik pisiarni allagartaa kommunip allaffianut takutissallugu kiisalu qaartartut atoriikkani takutissallugit normuisa misissorneqarnissaat siunertaralugu.

Imm. 3. Pisamik taassumaluunniit ilaanik tuniniaasoqaranilu pisisoqassanngilaq, akuersissummik allagartamilluunniit piginnittup akuersissutip allagartalluunniit nuutinneratigut uppersaareersimatinagu, tuniniaaniarluni pisumi qinnuigineqarnikkut takutinneqartussamik. Nuutinneratigut takuneqarsinnaassaaq, pisarineqartoq kommunimi oqartussaasumit nalunaarsorneqarsimasoq.

Imm. 4. Taamaattoq kommunip allaffiata ammanerisa avataatigut tuniniaaneq aallartinneqarsinnaavoq allaffiup ammanerata kingornatigut piaartumik nalunaarsuisoqareerpat.

Tunisineq

§ 29. Arferit angisuut nerineqarsinnaasortaanik angallatit tunitsivittut atorineqassanngillat.

Imm. 2. Tunitsivinnut akuerisaasunut pisarineqartunik tunisineq taamaallaat inuussutissarsiutigalugu piniartunit, piniarnermut allagartamik atuuttumik aamma akuersissummik allagartalimilluunniit naqissuserneqarsimasumik takutitsisinnaasumik pisinnaavoq § 28, imm. 1 aamma 3 naapertorlugu.

Imm. 3. Naalakkersuisut kommuninut pisassiissutini pisassiissutiniq tunisassanik aalajangersaasinnaapput, kommunini piniarsinnaanermut pisassiissutiniq tunineqarsimasuni.

Imm. 4. Tunineqarsinnaasutut pisassiissutiniq aalajangersaasoqarsimappat, tunitsiviit ullut tamaasa tunineqarsimasut annertussusii pillugit piffissami tunisinerup akuersissutigineqarfigisaani Aalisarnermut, Piniarnermut Nunalerinermullu Naalakkersuisoqarfimmut paasissutissiisassapput.

Imm. 5. Aalisarnermut, Piniarnermut Nunalerinermullu Naalakkersuisoqarfik tamanut saqqummiussaqaarluni nalunaaruteqartassaaq www.naalakkersuisut.gl atorlugu tunisineq qaqugu taamaatinneqassanersoq kommunimi sumiiffimilluunniit aqutsiviusumi pineqartumi.

Tuniniaaneq

§ 30. Atuisussavimmut, taakkununga ilanngullugit igaffissuaqarfinnut, neriniartarfinnut, sullissiveqarfinnut assigisaannulluunniit, kiisalu najukkani kalaalimeerniarfinniit tuniniaanerit aamma inuinnarnut tunisaqartarnerit taamaallaat inuussutissarsiutigalugu piniartunit inuussutissarsiutigalugu piniarnermut allagartamik atuuttumik pigisaqartumit ingerlanneqarsinnaavoq aamma akuersissummi allagartamilluunniit § 28 imm. 1, 3 aamma 4 naapertorlugit naqissuserneqarsimasunik takutitsisinnaasumit, imaluunniit taamaasiorsinnaanissamut inunnit piginnaatinneqarsimasunik qinnuigineqarnerminni uppersaatinik takutitsisinnaasunik.

Imm. 2. Suliffeqarfinnut toqqaannartumik tuniniaaneq taamaallaat inuussutissarsiutigalugu piniartunit inuussutissarsiutigalugu piniarnermut allagartamik atuuttumik peqartumit ingerlanneqarsinnaavoq aamma akuersissummik allagartamilluunniit § 28 imm. 1, 3 aamma 4 naapertorlugit naqissuserneqarsimasunik takutitsisinnaasumit, imaluunniit taamaasiorsinnaanissamut inunnit piginnaatinneqarsimasunik qinnuigineqarnerminni uppersaatinik takutitsisinnaasunik.

Imm. 3. Igaffissuaqarfiit, neriniartarfiit, sullissiveqarfiit assigisaallu imm. 1-imi taaneqartut, kiisalu suliffeqarfiit imm. 2-mi taaneqartut uppersarsinnaassavaat neqit, orsut, qipoqqat mattaallu arfernit angisuuneersut inuussutissarsiutigalugu piniartunit inuussutissarsiutigalugu piniarnermut atuuttumik naqissuserneqarsimasunik allagartalinneq akuersissutilinniilluunniit pisisimanertik uppersarsinnaassavaat, § 28, imm. 1, 3 aamma 4 naapertorlugit.

Imm. 4. Imm. 1-imiit 3-mut naapertorlugit uppersarsaat, atsiorneqarsimasooq akiliisimanermut uppersarsaataasooq inuussutissarsiutigalugu piniarnermut allagartamik atuuttumik nuutinneqarsimasunik naqissuserneqarsimasunik akuersissutitalik allagartartalilluunniit.

§ 31. Inuussutissarsiutigalugu piniarnermut allagartaq atuuttoq, akuersissut, allagartaq tunisinissamut akuerineqarsimaneq qaqugukkulluunniit politiinit, piniarnermut aalisarnermullu nakkutilliisunit aamma inunniit taamaasorsinnaanissamut piginnaatinneqarsimasunit qinnuigineqarnermi takutinneqarsinnaassaaq.

Kapitali 8

Uumassusilerinikkut misissugassat assilisallu

§ 32. Kinaluunniit arfermik angisuumik pisaqarsimasooq pisussaavoq neqiminermik mattattalimmik kommunip allaffianut pilanneqarnerata kinguinnguatiqut piaarnerpaamik misissugassamik tunniussinissamut, suuneranik, ullormik sumilu pisaqarsimaneranik paasissutissartalerlugu. Neqinik misissugassat poorineqartussamut plastikiusumut Pinngortitaleriffimmit tunniunneqarsimasumut aanaveersaammik imerpalasortalimmut ikineqartassapput.

Imm. 2. Kommunip allaffiata misissugassat paasissutissallu tiguneqareernerisa kinguinnguatiqut Pinngortitaleriffik, Box 570, 3900 Nuummumut nassiutissavai.

Kapitali 9

Arfernik takornariartitsisarneq

§ 33. Kommuni ileqqoreqqusaliorsinnaavoq arfanniarnep aamma arfernik takornariartitsisarnerup ingerlanneqartarneranut maleruagassanik.

Kapitali 10

Kommunit ileqqoreqqusaat

§ 34. Kommunalbestyrelsi nunaqarfinni siulersuisunik aamma najukkani aalisartut piniartullu peqatigiiffianik tusarniaareerluni kommunimi ileqqoreqqusakkoortumik piumasaqaatinik aalajangersaasinnaavoq § 4, § 5, § 9, imm. 3 aamma 4, § 13, §§ 26-28 kiisalu § 33-imi aalajangersakkanik sukannernerusunik aalajangersarneqarsimasunit.

Imm. 2. Kommunimi ileqqoreqqusat Aalisarnermut, Piniarnermut Nunalerinermullu Naalakkersuisoqarfimmit atuutilersinneqassapput.

Kapitali 11

Immikkut akuersissuteqarneq

§ 35. Ilisimatusarneq anguniagarineqarpat Aalisarnermut, Piniarnermut Nunalerinermullu Naalakkersuisoqarfimmut nalunaarutip matuma aalajangersagartaanit immikkut ittumik akuersissuteqarsinnaavoq.

Kapitali 12

Nalunaaqutseruineq, annissuineq aamma pineqaatissiissutit

§ 36. Arfernik angisuunik uumatillugit misissugassanik tigusinerit, nalunaaqutseruinerit kiisalu sulinerit allat misilittaanertallit taamaallaat Pinngortitaleriffimmit suliarineqartarsinnaapput.

Imm. 2. Inuit allat Aalisarnermut, Piniarnermut Nunalerinermullu Naalakkersuisoqarfimmiit akuersisummik pissarsiniassapput.

§ 37. Uumasut nujuartat nungutaanissaminnik navianartorsiortinneqartut naasullu nunani tamalaani nioqqutigineqartarnerat pillugu isumaqatigiissut 3. marts 1973-imeersoq (Washingtonkonvention/CITES) naapertorlugu arferit angisuut neqaannik, mattaannik il.il. iluanaarniutigalugu annissuinissaq eqqussuinissarlu inerteqqutaapput.

Imm. 2. Akuerisaavorli arferit angisuut § 35 naapertorlugu pisarineqarsimasut ilaannik annissuisinnaaneq.

§ 38. Nalunaarummi ukunani § 2, § 8, imm. 2 aamma 4, § 9, imm. 3 aamma 7, §§ 11, 12, § 13, unioqqutitsinerit § 13, imm. 5, §§ 15, 16, 18, 19, 25, § 27, § 32, 36 aamma 37-mi piumasaqaatit naammassinagit Kalaallit Nunaanni Pinerluttulerinermi inatsisimi malittarisassat malillugit akiliisitsinermik pineqaatissiisoqarsinnaavoq.

Imm. 2. Nalunaarut malillugu peqqusummik atortussanngortitsisoqarsimappat akiliisitsinermik pineqaatissiisoqarsinnaavoq Kalaallit Nunaanni Pinerluttulerinermut inatsisimi malittarisassat malillugit.

Imm. 3. Inatsisartut inatsisaat imaluunniit Inatsisartut inatsisaat malillugu peqqussusiortoqarsimappat akiliisitsisoqarsinnaasoq, akiligassaq inatsisilerinermi inuttut isigineqarsinnaasumut akiligassanngortinneqarsinnaavoq Kalaallit Nunaanni Pinerluttulerinermut inatsisimi malittarisassat malillugit.

Imm. 4. Suliat imm. 1-3 malillugu suliassiissutaasut Kalaallit Nunaanni Eqqartuussivimmi Siullertut suliarineqassapput..

Imm. 5. Akiliisitsissutit imm. 1-2 malillugit aalajangersakkat Nunap Karsianut pisassanngortinneqassapput.

Imm. 6. Kalaallit Nunaanni Pinerluttulerinermi inatsisimi malittarisassat malillugit imm. 1-imi aalajangersakkanik unioqqutitsineq arsaarinnittoqarsinnaavoq.

Kapitali 13

Atuutilersitsineq

§ 39. Nalunaarut atuutilissaaq ulloq 7. december 2018 aallarnerfigalugu.

Imm. 2. Arfernik angisuunik illersuineq piniarnerlu pillugit Namminersorlutik Oqartussat nalunaarutaat nr. 12, 22. december 2014-meersoq peqatigitillugu atorunnaarsinneqarpoq.

Imm. 3. Akuersissutitut allagartat akuersissutillu 2019-imut atuuttut nalunaarut manna naapertorlugu malittarisassaqartinneqarput.

Namminersorlutik Oqartussat, ulloq 6. december 2018

Nikkulaat Jeremiassen

/

Jørgen Isak Olsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut